





余里居待次著有讀書記三卷門類未經編緝亦
間有未卒業者同學請於余然不敢漫付棗梨茲
就敝篋中搜出雜記若干條分爲四卷梓行於世
亦聊以資藝林之談謔云尔嘉慶八年夏蓉裳陸
雲錦識

芝菴雜記卷一目錄

范文正公上書

版築

宣和御筆畫鷹

孟子逸語

辟疆園

拙句

瓜關

蔡氏狀元

老卒回易

懋遷有無化居

止戈爲武賦

漢壽亭侯印

刺面正字

啖石

勤有三益

響豆

宗孝宗小字

雲南某宦女

蟹

吳中俗諺

物畏其天

貢院火災

奇石石蟹

秋香

牛產麟

郎當曲

買宅得銀

姑蘇城隍

周瓚

白小

榕樹

妬婦喻

斑竹

王雲芝

別頭試

太公辟紂處

會試預兆

蔣虎臣

雉噫

新城王氏始祖

銅瓜

饑民必救

蘇公扇

倭奴入寇

死婦生兒

軟槃

東坡知揚州

榜貼

孟子

奇疾

妾魚

卦影

義犬

八士考

黃小

耗

伯夷太公

以我一日長乎爾

蜂分日

吹笛

獸種

收藏墓誌碑碣

弓足

怪民入宮

荔支

東坡待客

蛇化劍

劉綿花

羸殼飛蠶

彭祖

獅子畏吼

趙遜

鐘與蛟鬪

王荆公論詩

屋上墜物

進青魚

摺扇

載酒問奇

松江三梭布

古鏡

明皇還京

木稼

服硫黃

氣之先見

文五峰

犀杯

利市

三官像自移

喬仲倫

蛟化木

天移井

避瘧

神龍

芝菴雜記卷一

范文正公上書

婁東陸雲錦蓉裳



中吳紀聞云范文正公居母喪上書宰執請擇郡守
舉縣令斥游惰去冗僭遴選舉崇教育養將材實邊
備保直臣斥佞人使朝廷無過生靈無怨凡萬餘言
時王文正公為相見而偉之服滿薦充館職由此為
人主所知不次擢用慶歷三年上開天章閣訪以治
道公條陳當世急務十條曰明黜陟抑僥倖精貢舉

擇官長均公田厚農桑修武備覃恩信重命令減徭
役上嘉納之一歲之間次第舉行無或遺者公初上
宰相書卽受知於王文正後陳十事卽見聽於仁宗
雖曰抱負奇偉自非聖君賢相委曲信任之亦安能
行其所學耶

版築

菽園雜記云孟子云傳說舉於版築之間屈原云說
操築於傅巖兮武丁用而不疑二書築字猶周詩築
室百堵之築蔡氏註說築傅巖之野云築居也今言
所居猶謂之卜築蓋以版築胥靡之事說賢者不宜
有此爲賢者諱故云然尔然孟屈去殷周末遠必有
所傳况耕稼陶漁不足以病舜釣弋獵較不足以累
孔窮而操築亦何足以爲說諱乎

宣和御筆畫鷹

池北偶談云武昌張氏有子婦爲狐所媚百計驅之
不獲一日置酒召客張宣和御筆畫鷹於堂上比客
去狐夜分始至云幾不免婦問之狐曰汝家堂上有
神鷹見我卽奮欲搏擊微項有鐵絙將不免矣質明

狐去婦以語其夫或謂之曰畫誠神物曷燕去其絙
狐必不敢復至矣如其言至夕果有狐擊死堂下後
其家遭回祿其見鷹從火中飛去

孟子逸語

孟子逸句有云人之所知不如人之所不知信矣見
梁武帝答臣下神滅論又見釋道安教指通局又君
王無好智君王無好勇勇智之過生平患禍所遵正
當仁義爲本見蕭子良與孔中丞書

辟疆園

中吳紀聞云吳中舊傳池館林木之勝惟辟疆園爲
第一辟疆姓顧氏晉人見於題咏者甚衆李太白云
柳深陶令宅竹暗辟疆園陸羽云辟疆舊林園怪石
紛相向陸龜蒙云吳之辟疆園在昔勝槩敵皮日休
云更葺園中景應爲顧辟疆張伯玉云于公門館辟
疆園放蕩襟懷水石間今莫知其遺跡所在

拙句

鶴林玉露云作詩必以拙進以拙成故作字惟拙筆
最難作詩惟拙句最難至于拙則渾然天全工巧不

足言矣古人拙句曾經拈出如池塘生春草楓落吳江冷澄江靜如練空梁落燕泥清暉能娛人游子澹忘歸大江流日夜客心悲未央明月入高樓流光正徘徊採菊東籬下悠然見南山如此等類固已多矣以杜陵言之如兩邊山木合終日子規啼野人時獨往雲水曉相參喜無多屋宇幸不礙雲山在家常早起憂國願年豐若無青嶂月愁殺白頭人百年渾得醉一月不梳頭一徑野花落孤村春水生此五言之拙者也春水船如天上坐老年花似霧中看竹葉于

人既無分菊花從此不須開莫愁身外無窮事且盡生前有限杯雷聲忽送千峯雨花氣渾如百和香秋水纔添四五尺野航恰愛兩三人酒債尋常行處有人生七十古來稀此七言之拙者也他難殫舉可以類推杜陵云用拙存吾道夫拙之所在道之所存也詩文獨外是乎

瓜鬪

居易錄云順治丙戌益陽縣單家園民家瓜棚有二瓜大如盆盎相距三尺許每夜犬吠其下不止月夜

芝者雜言 卷一 四
覘之則二瓜相擊如鬪狀明日剖視之中各有蝦蟆
一躍出投火中亦無他異

蔡氏狀元

池北偶談云德清蔡翁者築室落成夢人持一盤授
之盤有四紅箋箋各大書一一字後其孫奕琛爲刑
部侍郎南渡拜相官一品奕琛子啟傳 國朝康熙
庚戌科狀元及第啟賢子升元康熙壬戌科狀元及
第皆其曾元也兩狀元皆生於此宅升元從弟彬辛
酉浙省解元人始悟四一字之兆升元生時其父夢

一金甲神人持紅箋大書其廳事云第一甲第一名
蔡升元遂以名之而字曰徵元及壬戌殿試日又夢
如前升元及第其父年才四十六

老卒回易

鶴林玉露云張循王之兄保嘗怨循王不相援引循
王曰今以錢十萬緡卒五千付兄要使錢與人流轉
不息兄能之乎保默然久之曰不能循王曰宜弟之
不敢輕相援引也王嘗春日遊後圃見一老卒臥日
中王蹴之曰何慵眠如是卒起聲諾對曰無事可做

之者來言 卷一 五
只得慵眠王曰汝會做甚事對曰諸事薄曉如同易之類亦粗能之王曰汝能回易吾以萬緡付汝何如對曰不足爲也王曰付汝五萬對曰亦不足爲也王曰汝需幾何對曰不能百萬亦五十萬乃可耳王壯之予五十萬恣其所爲其人乃造巨艦極其華麗市美女能歌舞音樂者百餘人廣收綾錦奇玩庶羞佳果及黃白之器募紫衣吏軒昂閒雅若書司客將者十數輩卒徒百人樂飲逾月忽飄然浮海去逾歲而歸珠犀香藥之外且得駿馬獲利幾十倍時諸將皆

缺馬惟循王得此馬軍容獨壯大喜問其何以致此曰到海外諸國稱大宋回易使謁戎王餽以綾錦奇玩爲招其貴近庶羞畢陳女樂迭奏其君臣大悅以名馬易美女且爲治舟載馬以犀珠香藥易綾錦等物餽遺甚厚是以獲利如此王咨嗟褒賞賜予優厚問能再往乎對曰此戲也再往則敗矣願仍爲退卒老園中嗚呼觀循王之兄與浮海之卒其智愚相去奚翅三十里哉彼卒者頽然甘寢苔階花影之下而其胸中之智圓轉恢奇乃如此則等而上之若伊呂

芝者雜言 卷一
管葛者世亦豈盡無也哉但莫能識其人無由試其
蘊耳以一弊衣老卒循王慨然捐五十萬緡畀之不
問其出入此其意度之恢宏固亦足以使之從容展
布以盡其能矣勾踐以四封之內外付種蠡漢高捐
黃金四十萬斤於陳平由此其推也蓋不知其人而
輕任之與知其人而不能專任皆不足以有功視其
一往之後辭不復再有幾於知進退存亡者異矣

懋遷有無化居

史記仲尼弟子傳與時轉貨貫索隱曰家語貨作化

蓋古化貨二字多通用唐虞之世曰化而已懋遷有
無化居化者貨也至殷人始以貨名曰不殖貨利曰
殉於貨色曰不肩好貨于是移化之字爲化生化成
之化矣

止戈爲武賦

止戈爲武賦張弼首選其第七韻曰亦猶日並月以
爲明紀天之象王居門而日閏重歲之餘頗以此賦
馳名

漢壽亭侯印

雲谷雜記云紹興中洞庭漁人獲一印方僅二寸其制甚古紐有連環四兩兩相貫上有一大環總之蓋所以佩也漁者以爲金競而訟于官辨其文乃漢壽亭侯四字關羽嘗爲漢壽亭侯人疑必羽物也遂留長沙官庫吏見印上時有光焰因白于官乃遣人送荆門軍羽祠中光怪遂絕淳熙四年玉泉寺僧眞慈將獻之東宮印已函而未發忽光焰四起衆皆驚愕遂不復獻

刺面正字

觚不觚錄云故事投刺通書簡面皆書一正字及萬歷丙子入朝投刺俱不書正字初亦以爲雅旣而知其爲江陵諱也是正字一諱於秦始再諱於江陵矣

啖石

池北偶談云仙人煮石世但傳其語耳山東王阮亭尙書家有一傭人王嘉祿者少居勞山中獨坐數年遂絕烟火惟啖石爲飯渴卽飲溪澗中水遍身毛生寸許後以母老歸家漸火食毛遂脫落然時時以石爲飯每取一石映日視之卽知其味甘鹹辛苦以巨

之者新言 卷一
桶盛水掛齒上盤旋如風後母終不知所往

勤有三益

鶴林玉露云自大舜稱禹不過勤儉兩字况下於禹者可以不勤不儉乎余嘗論儉有四益勤亦有三益盖民生在勤勤則不匱一夫不耕必受其饑一婦不蠶必受其寒是勤可以免饑寒也農民晝則力作夜則頽然甘寢故非心淫念無從而生晉公父文伯之母曰瘠土之民莫不尙義勞也淵明詩曰田家豈不苦弗獲辭此難四體誠乃疲而無異患于是勤可以

遠淫辟也戶樞不蠹流水不腐周公論三宗文王之壽必歸之無逸呂成公釋之曰主靜則悠遠博厚自強則堅實精明操存則氣血循軌而不亂收斂則精神內守而不浮是勤可以致壽考也

響豆

池北偶談云樂安縣孫某年九十強健如四五十歲人自言生平惟服響豆每歲槐子將熟時輒令人守之不合鳥雀啄落既成實卽收作二枕夜聽其有聲者卽響豆也因棄其餘如是數易而得響豆所在每

樹不過一枚每歲服不過一粒如是者數十年矣無他術也

宋孝宗小字

雲谷雜記云孝宗本生母張夫人一夕夢絳衣人自言崔府君擁一羊謂之曰以此爲識已而有娠及孝宗誕育之際赤光照天室中如晝時秀王方爲秀州嘉興縣丞郡人皆以爲丞廡遭火久之方知爲張夫人免身是歲丁未其屬爲羊又有前夢之應故孝宗小字曰羊

雲南某宦女

居易錄云明末時楚中某公官雲南過一山險絕處輿夫失足其愛女墮山澗中謂必無生理號泣而去任滿遷官去滇再經其地設祭招魂而哭女忽自空中飛至家人皆驚以爲鬼也詢之曰女人也非鬼也當墮澗時自意必死比及山半罅於樹得不墮久之飢甚然不得下乃解帶繫樹徐緣而下其下乃無水聞澗草甚香試採食之遂不饑四望皆絕壁不通人久而安焉茹草旣久遍體生毛遂能輕舉意之所至

之者雜言 卷一
翩然赴之捷如飛隼適遊行澗中聞父母呼女名字
故來耳父母欲攜之歸不可曰此中甚樂不思家也
復飛而去

蟹

中吳紀聞云吳之出蟹舊矣吳越春秋云蟹稻無遺
種又陸魯望集有蟹志云漁者緯蕭承其流而障之
曰蟹籩又曰稻之登也率執一穗以朝其魁然後縱
其所至吳人謂之輸苾

吳中俗諺

菽園雜記云民間俗諺各處有之而吳中爲甚如舟
行諺住諺翻以箸爲快兒幡布爲抹布諺離散以梨
爲圓果傘爲豎笠諺狼籍以榔槌爲興哥諺惱躁以
謝竈爲謝歡喜此皆俚俗可笑處今士大夫亦有犯
俗稱快兒者

物畏其天

鶴林玉露云頴濱釋莊子曰魚不畏網罟而畏鷄鵠
畏其天也物之畏其天誠有可怪者余里中一村童
嘗見大蛙十數聚于汙池叢棘之下欲前捕之熟視

乃一巨蛇蟠棘下以次啖羣蛙羣蛙凝立待啖不敢動又村叟見蜈蚣逐一蛇行甚急蜈蚣漸近蛇不復動張口以待蜈蚣竟入其腹逾時而出蛇已斃矣村叟棄蛇于深山中踰旬日往視之小蜈蚣無數食其腐肉蓋蜈蚣產卵于蛇腹中也余又嘗見一蜘蛛逐蜈蚣甚急蜈蚣逃入籬捨竹中蜘蛛不復入但以足跨竹搖腹數四而去伺蜈蚣久不出剖竹視之蜈蚣已節節爛斷如蠶醬矣蓋蜘蛛搖腹之時乃灑溺以殺之也物之畏其天有如此者夫蛇之恣啖羣蛙自以爲莫已敵矣而不知蜈蚣之能涉其腹也蜈蚣之斃蛇育子自以爲莫吾禦矣而不知蜘蛛之能醢其軀也世之人昂昂然以凶毒自多者可以觀矣且蛙之不能敵蛇固也蜈蚣小于蛇矣而能制蛇蜘蛛小于蜈蚣矣而能制蜈蚣物豈專以小大爲強弱哉

貢院火災

菽園雜記云明朝開科取士京畿與各布政司鄉試在子午卯酉年秋八月禮部會試在辰戌丑未年春二月蓋定規也洪武癸未太宗渡江天順癸未貢院

火皆以其年八月會試明年三月殿試于是二次有
甲申科貢院火時舉人死者九十餘人好事者爲詩
云回祿如何也忌才春風散作禮闈災碧桃難向天
邊種丹桂翻從火裏開豪氣滿塲爭吐焰壯心一夜
盡成灰曲江勝事今何在白骨稜稜漫作堆至今誦
之令人傷感或云蘇州奚昌元啟作

奇石石蟹

居易錄云張芳洲雜錄云嘗見侯家美石一方中有
緋袍玉帶人端拱而坐又先人曾發砌石一紫色者
剖爲二其中樹石茂密一冠帶人立樹下凝眸遠望
若筆墨描畫者又家藏石蟹一枚具體如生以水磨
之腥氣如蟹病目者稍塗兩背能已痛皆奇物也

秋香

古夫于亭雜錄云小說有唐解元詭娶華學士家婢
秋香事乃江陰吉道人非伯虎也吉父爲御史以建
言譴戍道人於洞庭遇異人得道術能役鬼神嘗遊
虎邱時有兄之喪上襲麻衣而內著紫綾褲適上海
一大家攜室亦遊虎邱其小婢秋香者見吉衣紫顧

而一笑吉以爲悅已也詭裝變姓名投身爲僕久之
竟得秋香爲室一日遯去大家跡之知爲吉厚贈奩
具遂爲翁婿華則吉之本姓云

牛產麟

居易錄云康熙二十八年餘姚烏山胡氏有牛產一
麟狼項馬足麕身牛尾遍體肉鱗金紫相錯明年七
月蛟蜃出者以千計餘姚大水

郎當曲

魏鶴山天寶遺事詩云紅錦綳盛河北賊紫金盞酌
壽王妃弄成晚歲郎當曲正是三郎快活時俗所謂
快活三郎者卽明皇也

買宅得銀

中吳紀聞云崑山有一舊宅多出變怪無有售之者
林大卿求買之旣徙入中夜據廳事獨坐以示其不
恐忽見一白衣婦人縱其所如俄至一處所潛伏不
見詰朝使人穿其地得銀百餘錠其上皆鐫一林字

姑蘇城隍

史記云春申君初相楚後請封於江東考烈王許之

因城故吳墟以爲都邑吳地志亦云春申君嘗造蛇門以禦越軍相傳姑蘇城隍神乃春申君其廟食於此也固宜

周瓚

居易錄云太倉周瓚元恭以南公菴稿相示所選明史稿也瓚熟于史事梅村晚年招與讀書或事有疑誤輒就問之梅村先生留訂春秋諸書朝夕晤對垂二十年梅村沒後餬口於四方者十餘年旣而到京與徐健菴太史相善健菴南歸寄食同里錢黃門之邸暫爲蒙師曾有書遺予欲伸願見之意如瓚之遭逢可謂不幸矣

白小

賓退錄云靖州圖經載其俗居喪不食酒肉鹽酪而以魚爲蔬今湖北多然謂之魚菜不特靖也老杜白小詩云白小羣分命天然二寸魚細微霑水族風俗當園蔬正指此蓋老杜嘗往來荆楚故也

榕樹

皇華紀聞云嶺南多榕其樹支離輪囷不爲匠石所

取徃徃有數百年者韶州府署儀門內有二株大可十圍太守唐宗堯語人云樹中時有烟氣人以為神偶閱宦遊餘談云慶遠右江道署古榕樹大十餘圍樹根有竅出烟如縷晝夜不絕伐之得毒蛇數十殺之怪自此息則烟乃蛇虺所為非神也

妬婦喻

鶴林玉露云張無垢在越上作幕官不請供給錢在館中進書不肯轉官人皆以為好名之過無垢日既請月俸又受供給偶然進書又便受賞於我心實有

不安此亦本分事何名之好貪者徃徃不曾尋思此心病也心有病人安得知我知之我自醫別人既不自知病反惡人醫病猶婦人妬者非特妬其夫又且妬人之夫其惑甚矣無垢此喻甚切世降俗薄貪濁成風反相與非笑廉者諛佞成風反相與非笑直者軟熟成風反相與非笑剛者競進成風反相與非笑恬退者侈靡成風反相與非笑儉約者傲誕成風反相與非笑謙默者賈子云莫邪為鈍兮鉛刀為銛東坡云變丹青於玉瑩兮乃反謂予為非智亦即無垢

之意爾

斑竹

臨溪詩話云竹有黑點謂之斑竹非也湘中斑竹方生時每點上苔錢封之甚固土人斫竹浸水中用草穰洗去苔錢則紫暈爛斑可愛此真斑竹也韓愈曰剝苔吊斑林角黍餌沉塚是也

王雲芝

居易錄云歷城明翰林王雲芝成化甲辰進士及第三人諸生時讀書卧牛山寺夜見地有火光發之

得石匣匣有書二冊讀之遂能御風出神知未來休咎生平異事甚多嘗與僧采枸杞山上僧先下扣門公已先在啟扇官河南四川督學試日諸生見鎖院廳廡各有一公危坐一日見白雲一片命騎追之雲落地化爲石色如雪煮食之其甘如飴曰此雲母也行輝縣山中忽下輿拜曰丈乃在此令掘地得奇石置之百泉書院又於道左古垣中開視得紫石硯二枚各有鴛鴦一隻雌雄相向嘗云地如竹篩眼凡有異寶皆可見又采杞僧臨終公問所欲曰欲富貴兼

之公曰但堪作一藩王耳朱書其背曰蜀王比王生
第二子背上隱隱有書字尹恭簡旻寢疾問之曰有
大鶴入室飛旋已而颺去公之神也果然官終南國
子祭酒預知死期怛化時四城門皆見公羽衣鶴擎
而去如雲水道人鄉人於良鄉道中遇鼓吹從南來
視之乃公也王陽明素推服之張尙書鶴鳴為作傳

別頭試

鶴山筆錄云景祐中賈文元言諸道州有合避親三
等舉人乞詔漕臣彙聚更命官較試十取三焉今運
司貢事昉于此記得唐人有別頭試

太公辟紂處

中吳紀聞云常熟海隅山有石空十所昔大公辟紂
居之孟子謂太公辟紂居東海之濱者此也常熟去
東海正六十里故謂之海濱楊備郎中嘗作詩紀其
事

會試預兆

菽園雜記載天順癸未會試寓京邸陸容嘗戲為魁
星圖題其上云天門之下有鬼踢斗癸未之魁筆錠

芝菴雜言 卷一
入手貼於座壁。何失去時。陸鼎儀寓友人溫秉中家。出以爲翫。陸容爲之惘然。問所從來。云昨日倚門一兒持此示我。以果易之。文量默然以爲此我二人得失之兆矣。未幾鼎儀中第一。文量公下第。

蔣虎臣

池北偶談云。蔣虎臣金壇人。自號華陽山人。幼耽禪。寂不苟葷酒。祖母夢峨眉山老僧而生。生數歲嘗夢身是老僧所居茅屋一間。屋後流泉。遶之自伸一足入泉洗濯。其上高山造天。又數夢古佛入已室與之

談禪。年十五時有二道人坐其門。說山人有師在峨眉。眉二百餘歲。恐其墮落。云云。久之乃去。順治丁亥先生以一甲第三人及第。入翰林。二十餘載。率山居。僅自編修進修。撰終于史官。性好山水。徧游五岳及黃山。九華。匡廬。天台。武當。不避蛇虎。晚自史館以病請告。不歸。江南附楚舟上峽。入峨眉山。以癸丑正月卒。於峨眉山之伏虎寺臨化。有詩云。偶向鑊湯求避熱。那從大海去翻身。功名傀儡場中物。妻子枯骸隊裏人。嘗自謂蜀相蔣琬之後。在蜀與修四川通誌。以琬

故徧叩首巡撫藩臬諸司署前其任誕不羈如此

雉噫

丹鉛錄云揚子五百篇論孔子因女樂去魯曰不聽政諫不用雉噫注雉噫猶歌歎之聲梁鴻五噫之類也琴操曰季桓子受齊女樂又不致膳俎於大夫孔子遂行師已送之曰夫子則非罪也孔子曰吾歌可乎歌曰彼婦之口可以出走彼婦之謁可以死敗優哉游哉聊以卒歲此卽雉噫之歌也衝波傳云孔子相魯齊人懼而欲敗其政選齊國好女八十人皆衣

文衣而舞容璣季桓子語魯君爲周道游館孔子乃行覩雉之飛鳴嘆曰山梁雌雉時哉時哉色斯舉矣翔而後集因爲雉噫之歌曰彼婦之叩可以出奏彼婦之謁可以死北優哉游哉聊以卒歲揚子所云雉噫者指此唐人學宮碑文云聆鳳哀於南楚歌雉噫於東魯亦用揚子之語也今本無雉字故詳具之以廣異聞

新城王氏始祖

王氏始祖妣初夫人諸城人年始笄一日忽爲大風

吹至新城之曹村時琅琊公方爲某大姓傭作未婚
遂作合焉三世至穎川公而讀書仕官四世至太僕
公始大其門二百年來科甲蟬連不絕皆其所出也
事載林居漫錄亦載池北偶談乃記實也

銅瓜

湧幢小品云新城王氏司徒公以終養告歸舊有撫
楚時銅瓜二命工鎔之忽成峯巒洞壑之狀及南極
老人西王母八仙之形無不酷肖是日卽太夫人九
十壽辰

饑民必救

雲間雜誌云萬歷中歲饑人情惱惱當事者令人擬
告示禁約俱不稱意乃取一白牌大書八字曰饑民
必救亂民必斬

蘇公扇

春渚紀聞云東坡在錢塘日有訴負綾絹錢二萬者
公詢之云以製扇爲業適父死又連雨天寒扇不售
故負之也公熟視久之曰取汝扇來須臾而至公取
白團夾扇二十就判筆作行草及枯木竹石頃刻而

盡其人泣謝出初踰府門人爭以千錢取一扇所持立盡遂償所逋杭人有感泣者

倭奴入寇

雲間雜誌云嘉靖三十二年倭奴入寇江南殘破分宜當國妄奏寇平時徐文貞爲次相其子仰齋入都將謁分宜文貞恐其應答差誤商議兩日夜始謁分宜他無所問惟詢江南倭寇若何仰齋答云勢甚猖獗分宜不懌文貞知之率仰齋請罪始釋然

死婦生兒

居易錄云西安一民婦孕將娩暴卒殮且葬矣一日其夫過市見一婦人攜竹筐前走衣飾舉止悉如其妻心動尾其後遶出城郭婦人直趨墓所忽不見卽妻葬處也告於官啟而視之發土及槨輒聞兒啼棺已開矣兒坐槨中旁有竹筐貯餽飪如初飼兒口中者捫其妻則無生氣乃闔棺仍瘞之取子以歸與生人產者無異

軟槃

沈存中筆談載石曼卿居蔡河下曲隣有豪家曼卿

訪之延曼卿飲羣妓十餘人各執肴果樂器一妓酌酒以進酒罷樂作羣妓執肴果者萃立其前食罷則分列其左右京師人謂之軟槃事見五代史

馬令南唐書云江南李氏宰相孫晟每食不設几案使衆妓各執一器衆立而侍號肉臺槃時人多效之

東坡知揚州

賓退錄云東坡知揚州夢行山林間一虎來噬方驚怖有紫衣道士揮袖障公叱虎使去明日一道士投謁曰夜出不至驚畏否公咄曰鼠子乃敢爾本欲杖汝脊汝謂我不知汝子夜術耶道士惶駭而退

榜貼

榜貼之制起於宋朝登第時所謂金花貼子者是也嘗考王扶盛京二貼子其製用塗金黃紙大書姓名於上下有兩知舉花押仍用白紙作一大貼貯之亦題姓名於上後吳南英於周叅政處模寫二本爲世所罕見云

奇疾

謝在杭云澗有一士人手指忽痛指甲間生珊瑚高

二寸許氣成海市有人物城郭樓臺醫皆不識何症
或以爲火也投以大黃而愈此與穆桂陽晚年額上
皮肉腫起晶瑩中有一人騎驢往來終日不少休同
一怪症

孟子

古夫子亭雜錄云日本國中重儒書十三經而下無
所不有獨無孟子中國人有私攜過海者輒有風濤
蛟龍覆舟之患此理之不可曉者

妾魚

古者一國嫁女同姓二國媵之儀禮有媵爵謂先飲
一爵後二爵從之也楚辭魚鱗鱗兮媵予江海間有
魚遊必三如媵隨妻先一後二人號爲婢妾魚余有
句云桃花浪暖魚兒媵本楚辭也

卦影

中吳紀聞云韓中孚將游上庠聞市肆有精軌草術
者中孚筮之畫一金章紫綬人有祕色瓶在其旁復
有一人處圓圈中術士謂之曰君此行未必到上庠
中途必爲貴人所留中孚未之信行次南徐適朱行

中爲郡守與之厚善聞其來倒屣迎之延於郡圃朱平生愛一祕色酒壺因晏客出視之圃中有草菴其狀甚圓中字下榻於其間與卦影所畫一一皆驗以此知不惟飲啄前定雖受用之物寢處之地亦非偶然者

義犬

皇華紀聞云康熙丁未十月潯山營卒某畜二獵犬甚馴一日出獵遇虎引弓射之虎騰上攫卒傷肩二犬自草間躍出一踞虎脊一嚙其喉虎狼狽遁去卒

賴以全

八士考

丹鉛錄云周有八士馬融以爲成王時人劉向以爲宣王時人他無所考汲冢周書克殷解乃命南宮忽振鹿臺之財乃命南宮伯達史佚遷九鼎三巫疑南宮忽卽仲忽南宮伯達卽伯達也尙書有南宮括疑卽伯括也則八士者南宮氏也以爲成王時人近之尙書南宮之姓與汲冢周書南宮之姓合伯達伯括與仲忽之名又合似是無疑聊筆之以俟博古者

黃小

唐書曰人始生為黃四歲為小十六為中二十一為丁六十為老

耗

後漢書章德竇皇后紀云家既廢壞數呼相工問息耗註引薛氏韓詩章句曰耗惡也息耗猶言善惡也今人以音問為耗起于此

伯夷太公

鶴林玉露云太公之鷹揚伯夷之叩馬道並行而不

相悖也太公處東海之濱進而以功業濟世伯夷處北海之濱退而以名節勵世二老者天下之大老也故各為世間辦一大事可謂無負文王之所養矣使伯夷出而任太公之事則太公亦必退而為伯夷之事所謂易地則皆然切意二老受文王之養平居暇日同堂合席念王室之如燬固欲起而救亂思冠冕之毀裂又恐因而階亂故水火相濟鹽梅相成各以一事自任如三仁之自獻自靖或殺身以全節或歸周以全祀或佯狂以全道均不失本心之德而已矣

芝春雜言 卷一
豈故相矛盾者哉觀伯夷之諫太公扶而去之日義士意可見矣

以我一日長乎爾

丹鉛錄云王符註以我一日長乎爾長老也無我也以用也孔子言已老矣不能用也而付用世于四子也故三子皆言用世也哲之言亦用世而非大用也冠者童子雩祭人也浴乎沂涉沂水也象龍從水中出也風乎舞雩風歌也詠而饋咏歌饋祭也職既輕于抱關擊柝事又適於鄉俗里閭不必居夷之遠

浮海之險也偶一爲之時適其適也自適其適而不適人之適也夫子與之者意在言外喟然者所感深矣

蜂分日

謝準父晞髮集有粵山蜂分日記云甌粵之南某山其民老死不知歲歷惟戶養蜂四時旦暮悉候之蜂之分也其日必吉人家無大小貿易皆趣成之事未及辦則以待後之分日至於婚嫁興作皆候焉蜂移之家若鄰若僕無遠近遞相報不敢隱有販者至其

地留一年書蜂分之日凡百有奇歸取歷驗之皆黃
道紫微天月德吉曜也物性之靈能通造化如此

吹笛

宋人小說記張子韶云閭巷有人以賣餅爲生吹笛
爲樂僅得一飽資卽歸臥其家取笛而吹如此有年
鄰有富人察其人甚熟欲委以財千餘初不可堅諭
之乃許諾錢旣入手遂不聞笛聲但聞籌算聲耳其
人大悔急還富人錢於是再賣餅明日笛聲如舊此
與唐劉伯芻所言安邑里粥餅人匆匆不暇唱渭城

事絕相類

獸種

家語曰馬十二月而生狗三月而生豕四月而生猿
五月而生鹿六月而生虎七月而生虫八月而生淮
南子本此魏畧云黃牛羗種孕身六月生廣志云獠
民七月生蜀郡記云諸獠娠皆七月生蓋獸種也

收藏墓誌碑碣

菽園雜記云前輩詩文稿不愜意者多不存獨於墓
誌碑碣之類皆存之者盖有意焉明景泰甲戌進士

蘇州錢源其先崑山人嘗以公差過崑訪求其祖墓
父老無能知者居數日沈通理檢家藏前人墓誌得
洪武七年邑人盧熊所作錢瑞妻章氏墓誌始知其
祖墓在崑山儒學之後而封表之於是知葬埋之不
可無誌而誌葬者世系墓地尤不可以不詳也士大
夫得親戚故舊墓文必收藏之而不使之廢棄亦厚
德之一端也源本沙頭郁氏子郁與錢世連姻錢無
子郁以一子爲其後後戍薊州錢氏則已絕矣

弓足

袁小倉答友人求娶妾札云從古詩書所載咏美人
多矣未有稱及脚者宋書稱男子履方婦人履圓唐
史稱楊妃羅襪韓冬郎詩六寸膚圓光緻緻皆不纏
足之明証李後主使窈娘裹足作新月之形相傳爲
纏足之濫觴墨莊漫錄亦載婦人弓足始於五代李
後主予觀六朝樂府有雙行纏其辭云新羅繡行纏
足趺如春妍他人不言好獨我知可憐唐杜牧詩云
綉尺裁良減四分碧琉璃滑裏春雲五陵年少欺他
醉笑把花前出畫裙

式詩云醉袂幾侵魚子纈

影纓長戛鳳凰釵知君欲作閒情賦應願將身作錦
鞋花間言詞云慢移弓底繡羅鞋則弓足之飾不始
於五代也

怪民入宮

周禮闈人職云奇服怪民不入宮註曰怪民狂易是
則先王固知其有此事而豫爲之防矣英宗實錄云
景泰三年五月朔以明日立太子具香亭于奉天門
有一人自外徑入執紅棍擊香亭曰先打東南甲子
木內使執之命付錦衣衛

荔支

居易錄云閩荔支有翰墨香者產銅山黃氏圃中石
齋之祖別墅也石齋之生圃生荔一株結實三百六
十五枚每歲實如之鄉試會試入翰林實倍之石齋
死樹亦枯

東坡待客

炙輠錄云東坡待過客非其人則盛列妓女奏絲竹
之聲聒兩耳至有終宴不交一談者其人往返更謂
待已之厚也或有佳客至則屏去妓樂盃酒之間惟

終日笑談耳

蛇化劍

雲煙續錄云昔漁者於江濱見雷公逐小黃蛇擊殺之化爲劍背有大字許旌陽斬蛇劍蓋至寶也今在張伯雨家

劉綿花

治世餘聞云劉閣老吉博野人屢干清議言官論之輒得溫旨人謂之劉綿花以其愈彈愈好也

羸殼飛蠶

池北偶談云周斯盛曾於人家見一羸貯水中別取水一盂入鹽少許置羸於內則羸殼自開飛出一蠶高尺許蠶尾一線綴殼中飛舞良久以殼還納原盂蠶卽縮入

彭祖

王逸楚辭註彭祖好和滋味善斟雉羹以事帝堯司馬彪莊子注彭祖八百猶悔不壽恨短晚而唾遠又曰彭祖餌雲母御女凡數十娶晚妻鄭氏妖淫敗道而死非壽終也東坡詩空飡雲母連山盡不見蟠桃

結子時

獅子畏狃

治世餘聞云明代西番貢獅子其性勁險一番人長與之相守不暫離夜則同宿於木籠中欲其馴率故少相離則獸眼異變始作威矣一人因近視之其舌畧黏則面皮已去其半又畜二小獸名曰狃形類兔兩耳尖長僅尺餘獅作威時卽牽狃視之獅畏伏不敢動蓋狃作溺着其體肉卽腐爛狃猖獗又畏雄鴻鴻引吭高鳴狃亦畏伏物類相制有如此

趙遜

池北偶談云順治初京師有賣水人趙遜者未有室同輩醱金謀爲娶婦一日於市中買一婦人歸去其帕則髮毳毳白居然嫗也遜曰嫗長我且倍何敢犯非禮請母事之居數日嫗感其忠厚曰醱錢本欲得婦耳今若此反爲君累且奈何吾幸有藏珠一囊紉衣中當易金爲君娶婦以報德越數日子市中買一少女子入門見嫗相抱痛哭則嫗之女也蓋母子俱爲旗丁所掠而相失者至是皆歸遜所嫗卽爲合卺

芝菴雜言 卷一
成禮嫗又自言洪洞人家有二子今尙存珠數顆可
鬻之爲歸計乃攜婿及女俱歸二子者固無恙一家
大喜過望嫗乃三分其產同居終其身人以爲遜忠
厚之報云

鐘與蛟鬪

皇華紀聞云三水縣華山地藏菴有宣和鐘一枚蛟
龍紐四週作鳥獸虫魚雲雷之形常出與石潭蛟相
鬪蟹戶多見之一日老僧古溪晨起誦經失鐘所在
久之隱隱有聲從空中來瞬息復懸如故淋漓水濕
上作龍腥自後風雨卽飛去遂俟其至破之今廢鐘
尙存菴中

王荊公論詩

臨溪詩話云魏道輔嘗與王荊公論詩魏曰凡爲詩
當使挹之而源不窮咀之而味愈長至如永叔之詩
才力敏邁句亦雄健但恨其少餘味爾荊公曰不然
如行人仰頭飛鳥驚之句亦可謂有味矣然細思之
不見此句之佳亦竟莫原荊公之意信乎所見各殊
不可強同也

元豐癸亥春道輔謁王荆公於鍾山因從容問公比
作詩否公曰久不作矣蓋賦詠之言亦近口業然近
日復不能忍亦時有之因口占一絕云南圃東岡二
月時物華撩我有新詩含風鳴綠鱗鱗起弄日鵝黃
嫋嫋垂此真佳句也

屋上墜物

居易錄云康熙十年潛江民吳某家屋上墜下一物
形如龜有兩翅頭有一角四足如人指色如羊肝以
刀刺之不能入其殼非骨非肉聲如雄鴨

進青魚

鶴林玉露云宋文帝時司徒義康顓總朝權四方饋
遺皆以上品薦義康而以次品供御上嘗冬月啖柑
歎其形味並劣義康曰今年柑殊有佳者遣人還東
府取柑大供御者三寸上寢不能平義康旋以罪廢
秦檜之夫人常入禁中顯仁太后言近日子魚大者
絕少夫人對曰妾家有之當以百尾進歸告檜檜咎
其失言與其館客謀進青魚百尾顯仁拊掌笑曰我
道這婆子村果然蓋青魚似子魚而非特差大爾觀

此賊檜之奸可見

摺扇

其製起於南宋時東坡謂高麗白松扇展之廣尺餘合之止兩指卽此也洪容齋隨筆記朱新仲有摺扇詩云宮紗蜂趕梅寶扇鸞開翅數摺聚清風一捻生秋意摇摇雲母輕裊裊瓊枝細莫解玉連環怕暮新花墜張安世見而書諸扇又豐坊云家有趙彥所畫摺扇又金章宗有題摺扇詞則摺扇宋金時已有之其時尚未盛行民間猶多用團扇天祿識餘曰今之

摺疊扇初名聚頭扇元時高麗始以克貢明永樂間稍效爲之至於揮灑翰墨則始于成化間蓬窻續錄亦謂貢自朝鮮永樂間乃盛行客中閒談曰撒扇永樂中朝鮮貢至上喜其舒卷之便命工如式爲之南方婦女猶用團扇惟妓女用撒扇近年良家婦亦用之矣癸辛雜識曰倭人聚扇用倭紙爲之雕木爲骨金銀花草爲飾郎瑛又謂黑骨泥金起于日本

載酒問奇

漢書揚雄傳云劉棻嘗從雄學作奇字韓文公題張

十六所居詩云端來問奇字爲我講聲形然傳但言學作奇字不言問奇字後來相承而用蓋又以韓詩爲本傳又云家素貧嗜酒人希至其門時有好事者載酒肴從游學與前學作奇字凡隔數十字了不相涉而近世文人多云載酒問字載酒問奇字不知何所本也

松江三梭布

菽園雜記載明代皇帝近體小衣俱用松江三梭布爲之並不用綾紬紗絹

古鏡

古夫于亭雜錄云宋慶歷時有宦官蓄一古鏡背鑄鬼形而其影在鑑中

明皇還京

小說載明皇自蜀還京以駝馬載珍玩自隨明皇聞駝馬所帶鈴聲謂黃幡綽曰鈴聲頗似人言語幡綽對曰似言三郎郎當三郎郎當明皇愧且笑

木稼

熙寧中華山圮雨木冰已而韓魏公薨而王荊公挽

詞云木稼曾聞達官怕山頽果見哲人萎西清詩語
謂用孔子及唐寧王事寧王事新書無之見于劉耀
遠舊史傳中開元二十九年冬京城寒甚凝霜封樹
學者以爲春秋雨木冰卽此是亦名樹介言其象介
胄也憲見而歎曰此俗所謂樹稼者也諺曰樹稼達
官怕必有大臣當之吾其死矣十一月薨

服硫黃

筆塵云昌黎公晚年遂有聲樂而服金石張藉祭文
云乃出二侍女合彈琵琶箏旣而遂曰翁疾日浸加
孺人侍湯藥白樂天思舊詩曰退之服硫黃一疾迄
不痊微之煉秋石未老身溘然退之嘗談人不解文
字頭而自敗于女妓乎作李博士墓誌戒人服金石
藥而自餌硫黃乎

氣之先見

鶴林玉露云歲將饑小民餐必倍俗謂之作荒此天
地之氣先見也宋開禧兵興之先江西果木秋冬生
花有山礬而生梔子花桃樹而生李實此天地之氣
先亂也

文五峯

快雪堂漫錄云五峯文伯仁工詩畫文待詔徵明從子也一日詣吳縣訴一逃僕少憇署前民家夢二青衣逮之意吾邑令所使殊憤憤須臾至一公府殿宇宏敞似非人間始懼上有王者呵曰訟汝者衆奈何文訴平生乃學究無罪王者笑曰忘之矣卽令一人若所謂冥司判官者以一青丸摩其頂寒沁徹心恍然悟前身爲正統間管長陵宦者冬鑿一池得蟄蛇百餘殺之俄而有蛇百餘攢螫焉王者曰爾等毋草

草姑退蛇忽不見王者又顧一判官曰此人欲償如許命卽百生不能奈何奈何且一人在生豈無一善試覓之判官因出數帙書檢之良久曰有之矣此人于永樂中曾隨吳某畫鷄鳴山廊畫得羅漢二尊又寫金剛經一部王者曰可矣因囑文曰汝數尙未盡亟歸多寫佛經可減前罪文寤記其事嘗以語人文平生不信佛至是乃寫經念佛寒暑不輟嘗寓閭門外之雲隱寺

犀杯

筆塵云關內劉貽哲謫海南市舶提舉云見一犀杯
注酒晝則日夜則月見於酒中酒盡則隱又見一珠
自然作獅子形纖悉畢具

利市

戒菴漫筆云唐子畏有一巨冊自錄所作文簿面題
曰利市觀此則潤筆之由來久矣作文受謝大抵起
于晉代唐寅則直以爲利也今之市肆帳簿多題此
兩字

三官像自移

居易錄云康熙辛未京城內彌佗菴三官像一夕自
移右安門外三官廟中如人位置者然

喬仲倫

皇華紀聞云喬仲倫桐城人好施予五十九而無子
族弟仲伍者常爲神役元旦謂仲倫曰兄今年必有
子子必高氏嫂出問云何曰除夕復命于東嶽之神
見一童子在廟門蹴鞠問之童子曰已得命當爲人
不知所向仲伍曰吾兄平生積善能子之乎童子曰
可請于岳神岳神令曹司檢文書報云喬仲倫爲善

芝者雜記 卷一
當與一嫡子故知今歲必子時妻高年已四十九不
妊十年踰月果孕生子名源及長好蹴鞠

蛟化木

快雪堂漫錄云朱時茂徽人世爲木客備知蛟化木
狀夏月從溪中浴見一木浮水欲跨之滑不可上疑
其爲蛟取銀簪插其上呼同浴者共牽挽之將就岸
復滑去者三四所插簪欲墮拔欲更插應手而沒
風濤大作衆驚竄未及家雨雹交下果蛟也蛟木類
畏五金

天移井

雲間雜誌云上海北橋甌山道院舊有井逼院門東
萬歷甲申秋夜雷雨大作忽移至河邊石甃如故離
舊址五尺餘矣里人報知邑侯許公親往驗之陸文
定命建亭其上董太史名天移井唐宗伯爲碑文

避瘧

賓退錄云世人瘧疾將作謂可避之他所間巷不經
之說也然自唐已然高力士流巫州李輔國授謫制
時力士方逃瘧功臣閣下杜子美詩云三年猶瘧疾

芝菴雜言 卷一
一鬼不銷亾隔日搜脂髓增寒抱雪霜徒然潛隙地
有覩屢鮮粧則不特避之而復塗抹其面矣

神龍

菽園雜記云薛主事機河東人言其鄉人有患耳鳴
者時或作癢以物探之出蟲蛻輕白如鵝翎管中膜
一日與其侶並耕忽雷雨交作語其侶曰今日耳鳴
特甚何也言未既震雷一聲二人皆踣于地其一復
甦其一腦裂而死卽耳鳴者乃知龍螫其耳至是化
去也戴主事春松江人言其鄉有衛生者手大指甲

中見一紅筋時或曲直或蜿蜒而動或恐之曰此必
承雨濯手龍集指甲也衛因號其指曰赤龍甲一日
與客泛湖酒半雷電繞船水波震蕩衛戲語坐客曰
吾家赤龍得無欲去耶乃出手船窗外龍果裂指而
去此正與青州婦人青筋癢則龍出事相類傳云神
龍或飛或潛能大能小其變化不測信矣哉

芝菴雜記卷一終



